



Sabtu, 12 Maret 2022
Ogen: Masmur 25:15



"Nare Ku Tuhan"



Passion peempatkan enda si gelari minggu okuli, si ertina nare ku Tuhan. Nare seri ertina ras natap ku datas. Lit si man arapenken i datas nari nusur man banta. Umpamana nareken lau bas pancur nari. Enggo pasti pancur e ganjangan asangkan ingan entah wadah nareken lau. Nare ku Tuhan ertina natap kempak Tuhan alu arapen lit si man alonken i bas IA nari. Entah e pergegeh, pengapul, kesehaten, rejeki, pengalemen dosa ras sidebanna. Nare ku Tuhan pe banci ka ngenehen karakter Tuhan, biak si lit i bas IA, dalanta erlajar ngikut-ngikutsa seh lit perubahren i bas dirinta ku si mehuli. Nare ku Tuhan e proses erlajar, mpelambarui diri, tambah warina tambah ulina. Nare ku Tuhan, e mpelajari sura-sura Tuhan nandangi kita. I bas nare ku Tuhan e lit kiniteruken ukur guna nungtungken kerina isi pusuhta man Dibata. Kenca nungtungken isi pusuh jumpa kita kemalemen ate.

Renungenta wari enda nuriken kerna pemasmur si nungtungken isi pusuhna man Tuhan, nina, *Aku tetap nare ku Tuhan nimai penampatNa, ipulahiNa aku i bas cilaka nari.* Pengalaman pemasmur sangana ikelilingi perbeben si mberat, iayak-ayak imbang-imbangana ia. Ersura-sura imbangna e lako munuh ia. Kiam ia ku negeri kalak si deban lako ndatken perlindungan, i je pe kepe labo aman, sabap negeri si itujuna e enggo erteman ras imbang-imbangna. Latih kal akapna, lanai tempa lit dalam pulah i bas perbebenna e nari. Seakatan man Dibata lanai lit inganna nuri-nuri. I bas ia ernalem man Tuhan, datna serpang pulah, amin pe arus ia teridah bagi kalak si la mehaga, labo engkurangi keleng ate Dibata man bana.

Katawari nge kita nare ku Tuhan? KEE 320 mereken jabapen; *Susah entah senang gia i bas geluh enda, Amin kita bas perbeben ernalem man baNa, nggeluh bas Tuhan malem ateta sibegiken pedahNa, Pindo gegeh ras pasu-pasuNa I'brekenNa man banta.*